

och mit erlichen gabungen, sunder mit ettlichen haitumen ¹⁾; darunder dan ain dorn von der kron Kriste des herren war. Söllich haitum und vererung liesz ich zuo Rodisz, und nam virdernusz ²⁾ von dem hochmaister an den künig von Zypern, der mainung, so ich an der widerfart ³⁾ von dem hailigen land wer, in Zypern zuo varn, als och nachmals geschah. Und als ich aber vernomen, dasz zuo Barutto, der hailige ⁴⁾ ritter sant Jörg den gryssenlichen wurm ⁵⁾ überwunden, och den selbigen küng, sin wyb und dochter und das gantz land zum kristenlichen glauben gebracht, ward ich sunderlich bewegt, dahin zuo vorderist zuo ziehen. Also kam ich gen Barrutto, und suocht daselbst die stett und kirchen, do sollich wunderzaichen geschehen seind.

Da dannen zoch ich mit gelait über land uff acht tagräsz, und kam in ettlich grosz stett, mit namen Tiro, Saffedo und Appolosso. Darnach gen Nassareth; dannen gen Jerusalem; und zoch also vir dasz gallileisch meer, dan ⁶⁾ dasz land haist Gallilea. Als ich nun die hailigen stett gesuocht und den mertail durchgangen und 15 tag zuo Jerusalem und darinn beliben war, stand mein gemiet ⁷⁾, wyter zuo sant Catherina und gen Baballonia zuo ziehen, und gesellt mich zuo ettlichen kauffluten und barfüsser-münchen. Och iberkam ich gar ain erlichen walbruoder; ⁸⁾ der war ain geschickt man, und genant der Münch von Basel. Der war nun och der mainung, zuo sant Catrina mit mier zuo ziehen. Wir zugen also mit gelätt und kamen bisz gen Damaschgo. Da solten ettlich bilger mer mit uns zogen sin, wie mir dan durch die koffleüt und Barfüsser anzozen ⁹⁾ hätten. Dise statt Damaschgo ist grosz und wolgebawen. Darinn ward uns gezögt dasz hus, da der hailig apostel Paulus inn gewesen war, und sunst vil ander stett, geschichten der hailigen und propheten. Als mir nun ettlich tag zu Damaschgo waren, und uns uff die wyt raisz zuo sant Catherina rüsten wollten, wurden ich und mein gesell gefangen und hart gehalten, und doch uff dasz letzt wurden mir ledig. Es kostet uns wol 30 docaten. Also ward unser raisz wendig ¹⁰⁾, dann mir mochten vor den haiden und Araben nit verner kumen. Mir zugen uff Alexandria

1) heiligen Reliquien. — 2) Schutzbricfe. — 3) auf der Rückreise. — 4) in der Handschrift steht: hailligen. — 5) den fürchterlichen Drachen. — 6) woher. — 7) war mein Herz und Sinn darauf gerichtet. — 8) Reisegefährten. — 9) erfahren. — 10) rückgängig.